



54. ՍՈՒՏ ՀԵՔԻԱԹ

Կըլնի, չիլնի մի մարդ, մի կնիկ: Սրանք շատ քյասիր, դառն-աղբատ, օրեն հացի մուրացկան են ըլնում: Սրանք ավալախորը մի հավ են ունենում, ըն էլ էնթավուր հավ, որ աղաքիցը էթողին կըտցով էր տալի, հտեիցը էթողին՝ քացով. ընենց որ էս հավի ահու սրանց քուշովը մարդ-մաղաթ սիրտ չէր անում անց կենա, էնքա՛մ մի ղուլումքյար զադ էր:

Գեղըցոնց ամալ-աջալը որ կտրում ա, օրեն մի օրը գալիս են տանուտերի կուշտը դանդատ: Էդ տանուտերն ա՝ կանչում ա հավի տիրոնչը, հրամայում ա, որ յա հավը մորթի, յա թե չէ քցի մի զերդամբի, վրեն դուռը շինի, որ դուս չգա, գնացող-էկողին չդիպնի: Տերն էլ չի ղմշում մորթի, տանում ա անում մի հացատուն՝ դուռը, երթիկը ղայմացնում, ծակ ու ծովերը կալնում, թողնում գալի: Լա՛վ:

Անց ա կենում ըսենց մի օր, էրկու օր, իրեք օր, մի շաբաթ, էրկու շաբաթ, մախլասի՝ մի ամիս, էս հավին ո՛նչ կուտ են տալի, ո՛նչ ջուր են դնում աղաքը՝ բալի սատկի, նրանից աղատվեն պըրծնեն: Օրեն մի օրը էդ մարդի միտն ա ընկնում հավը:

— Ա՛յ կնիկ,— ասում ա,— ըսկի ակը չենք տալի մեր հավին, ո՛վ գիտա՝ հմի սատկել ա, որդնե, ֆոտոն աշխար ա վեր ունում, էթամ, տանեմ դեն էլա քցեմ:

— Լա՛վ, ա՛յ մարդ,— ասում ա կնիկը,— դնա՛ տես, թե սատկե՛լ ա՛ տա՛ր դեն քցա՛:

Էս մարդը էթում ա, հացատան դուռը բաց անում, ի՛նչ տենում՝ հացատունը ընչանք օջորքը լիքը ձու ա. դու մի ասի, է՛ն հավն ա ածե: Մարդը ուրախանում, աշխարով մին ա ըլնում:

Էթում ա կնկանը իմաց տալի.— Բա՛ չես ասի,— ասում ա,— ըսե՛նց, ըսե՛նց բան:

Մարդ ու կնիկ էթում են ամեն մինը մի քթոց վեր ունում, գալի, է՛դ ձվանները բիրադի կրում իրանց կալը: Կրում են պրծնում, հենա իրանց գոմշները լծում են կամին, քշում: Քշում են, քշում են, ընչանք ճաշ քշում են, ձվանները բիրադի փխլվում, խժռվում ա. տենում են՝ մի դճիցը աքլոր ա դուս գալի, մի դճիցը՝ վառեկ: Վերջը որ շատ քշում են, տենում են բիրդան ձվանների միջիցը մի ղազ գուս էկավ, փախավ: Տերը էդքամ աքլորն ու վառեկը թողում ա ըտե, ինքը ղազի ետևիցն ընկնում, որ կալնի: Էթում ա, էթում, մխելի տեղ էթում ա, տենում՝ հրես մի մարդ իրանց ղազը լծել ա կամին, կամ ա անում:

— Ա՛յ աղպեր,— ասում ա,— է՛դ մեր ղազն ա, խի՞ եք լծե:

— Մենք ի՛նչ իմանանք ձերն ա,— ասում ա է՛դ մարդը,— իրա տոմն էկավ մեր կալը, դե տեհանք՝ տեր-տիրական չկա, բերինք, լծեցինք. հմի ասում ես՝ ձերն ա, վե՛ կալ տար, ա՛ռ ըս էլ էրկու խալվար ցորեն դրա հախը:

Է՛դ մարդը էրկու խալվար ցորենը առնում ա, լցնում ջվալները, գյոզակները էրեսներին փռում, զայիմ կապում, բարձում ղազին, քշում դպա տուն:

Գալիս ա, գալի, հասնում ա իրանց տունը. ջվալները ղազի վրիցը վեր ա դնում. վեր ա դնում, տենում ի՛նչ՝ ղազի մեջքը յարալափաշա ա դառե: Մարդ ու կնիկ կմնան մոլորած: Դե՛ս կընկնեն, դե՛ն կընկնեն, է՛ս հարևանի դուռը, է՛ն հարևանի դուռը, հա՛յ դես, հա՛յ դեն, բո՛ւ յան, օ՛յ յան, դեղ, դարման չեն գտնի: Վերջը որ շատ կհարցնեն, ման կզան, մի մարդ սրանց կասի, թե. ճէ՛դ յարի դեղը պոպոքն ա, որ քսեք՝ ալրիալը կլավանա: Սատանական դրանց երկրումն էլ ըսկի պոպոք չիլնում: Դե՛ս են ընկնում, դե՛ն են ընկնում, չեն գտնում. վերջը որ շատ ման են գալի, տենում են՝ հրենիկ մի ահլի պառավ կնիկ քուչի դռանը նստած ա:

— Ա՛յ նանի,— ասում են,— քեզ արքայություն, թե քու որդ-

կերանց արեր կսիրես, բալի հոգապահուստ պոպոքի մանրուք ունենաս, մեր ղաղի մեջքը յարա ա էլեք, ի՛նչ կըլնի՝ տաս, քսենք միջքին:

— Ա՛յ որդիք,— ասում ա,— ես քորսիա էրեխա ի, հերս շընդըստանու պոպոք էր բերեք, կերանք. մի փետ տվե՛ք, քչփորեմ, տենամ, բալի ատամներիս արանքին մի կտոր մնացած ըլնի:

Մարդ ու կնիկ ուրախութիւններիցը էլ շեն իմանում, ի՛նչ անեն. բոտ մի եքա գերան ա վեր ընկած ըլնում, վեր են ունում, տալի էդ պառաւիկն: Էդ պառաւը էդ դերանովը ատամները քչփորում ա. է՛ս դիհը, է՛ն դիհը, սեղանքի տակիցը մի պճեղ պոպոք ա հանում, տալի դրանց: Նրանք ուրախանում են, պառաւի ձեռը պաշում, պոպոքը վեր ունում, եդ դառնում իրանց տունը: Բերում են, լավ նարին ծեծում, քսում ղաղի միջքին:

Անց ա կենում մի օր, էրկու օր, իրեք օր, մի շաբաթ, էրկու շաբաթ, իրեք շաբաթ, մախլասի՝ մի ամիս, մըն էլ տենում են՝ էդ ղաղի միջքին մի եքա պոպոքի ծառ ա դուա էկե, էնքա՛մ էլ պոպոք տվե, որ հալ ու հասար չըկա:

Էդ ղաղը աստու իրան օրը էթում էր հանդը արածում, իրկուներ ինքն իրան գալի տուն: Հանդումը հոտաղները, լակոտ-լուկուտը ո՛րը քար էր քցում, ո՛րը փետ էր քցում, ո՛րը ճիւմ էր քցում, որ պոպոք վեր ածեն, ուտեն. չայիր-չիմանը, քոլ ու քոսը ընկնում էր պոպոքի ծառի ճղքների արանքը, ընդերանք եքա չայիր չիման ա դուա գալի: Մարդիք նիլնում ին էդ չայիր-չիմանի վրեն, ընդե բաղ ու բաղչա քցում, բոստան քցում, վար անում, ցորեն, գարի ցանում. հոտաղները, շորաններն էլ բերում ին ընդե իրանց գառները, ոչխարը, տավարը արածացնում:

Օրեն մի օրն էլ մի մարդ նիլնում ա ղաղի միջքի բոստանը, մի ձմերուկ ա առնում, ուզում ա կտրի, ուտի, բիրդան դանակը խրվում ա ձմերկի մեջը, էլ դուա չի գալի:

— Ա՛յ հարայ, դա՛նակս, դա՛նակս,— էլ ո՛րդե, դանակը ձմերկի միջին բաթմիշ էլաւ, կորաւ:

Էդ մարդը ճարը կտրած, շորերը հանում ա, մննում ձմերկի մեջը, որ դանակը հանի. ձմերկի միջին դե՛ս ա ման գալի, դե՛ն ա ման գալի, չի գտնում. վերջը որ շատ ման ա գալի, տենում ա՝ հրենիկ դագանակը ուտին մի շորան:

— Ա՛յ աղպեր,— հարցնում ա շորանը,— ի՞նչ մարդ ես, էս ձմերկի միջին ի՞նչ ես շինում:

— Դանակս ընկել ա մեջը,— ասում ա,— ման եմ գալի, բալի գտնեմ:

— Է՛հ, ֆր՛դը հալիդ,— ասում ա շոբանը,— էս թամամ էրկու տարի ա՛ իմ եքա սուրու ոշխարը կորել ա էս ձմեռկի միջին, մեռա ման գալուն, շեմ կարում գտնի, դու հմի դանակդ ես ուղում գտնի:

Էդ խոսքը դանակ կորցնողի սրտին կպնում ա, վրա ա հասնում նրան, որ ժեժի. սա՛ նրան, նա՛ սրան, սա՛ նրան, նա՛ սրան, ըստե էնքամ իրար տալիս են, որ ձմեռուկը ժաժ ա գալի, դադի միջքիցը գըրըմփալեն վեր ընկնում գետինը, միջիցն էլ մի ալափստրակ ա դուս գալի, փախնում: Փախնելու վախտը էդ ալափստրակի պոշի տակիցը մի թղթի կտոր ա վեր ընկնում:

Հոտաղները էդ թղթի կտորը վեր են ունում, տանում գեղը, տերտերին տալի, որ կարդա: Տերտերը բաց ա անում, կարդում, տե- նում գրած ա. «Սո՛ւ,տ սո՛ւտ, սո՛ւտ», յանի թե էս դադի հեքաթը քոմմա սուտ ա:

